

- प्रधानमंत्री नरेन्द्र मोदी रोजगार मेळा मांय एक लाख ऊं बत्ता नौजवानां ने नियुक्ति पत्र दीना-जोधपुर अर अजमेर मांय ई रोजगार मेळा लगायी ज्या।
- केंद्रीय सड़क अर परिवहन मंत्री नितिन गडकरी करीब अढाई हजार करोड रूप्या रा खर्च ऊं प्रदेश री 17 सड़क परियोजनावां जनता ने सूंपी अर काम री नींव रखी।
- कतर री जेल मांय बंद करी ज्या भारत री नौसेना रा पैली वाळा कर्मचारी जेल ऊं छूट्यां पाछे भारत पाछा आया।
- चिकित्सा अर स्वास्थ्य विभाग री ओर ऊं प्रदेश मांय 15 ऊं 29 फरवरी ताई चिकित्सा संस्थानां री जांच रो अभियान चलायो जावेला।

000

प्रधानमंत्री नरेन्द्र मोदी कह्यो है के वां रा राज मांय सरकारी नौकरियां सारु भर्ती रा काम मांय साफगोई लायी ज्यी है। वे आज लगायी ज्या रोजगार मेळा मांय 1 लाख ऊं बत्ता नुवी नौकरी लाग्या लोगां ने वीडियो कांफेंस रे मार्फत संबोधित कर रह्या हा। प्रधानमंत्री कह्यो के सरकार भर्तियां रा कामां ने तैय मियाद मांय पूरा करण माथे खास ध्यान दे रही है। वे कह्यो के सरकार नौजवानां ने सागे ले र विकास रा काम मांय वां री भागीदारी तैय करण री कोशिश कर रही है। प्रधानमंत्री कह्यो के लारला दस साल मांय वां री सरकार लारली सरकार रा दस साल रे दौरान दीरीजी नौकरियां रे मुकाबले डोढ गुना बत्ती नौकरियां दीनी है। वे कह्यो के भारत स्टार्ट-अप रा मामला मांय ई नुवी ऊंचाइयां हासिल कर रह्यो है।

.....

ई मौके प्रधानमंत्री नई दिल्ली मांय एकीकृत परिसर कर्मयोगी भवन रा पैला दौर रा काम री नींव ई रखी। पूरा देश मांय आज 47 ठाँडां रोजगार मेळा लगायी ज्या। आं मांय राजस्थान रा जोधपुर अर अजमेर ई मेळा है। जोधपुर रा बी.एस.एफ फ्रंटिया मुख्यालय मांय राख्यी ज्या रोजगार मेळा रा कार्यक्रम मांय जल शक्ति मंत्री गजेंद्र सिंह शेखावत नुवा नौकरी लागण वाळां ने नौकरी लागण रा कागद सूंप्या। ई मौके वे कह्यो के देश आज बदलाव रा दौर ऊं निकळ रह्यो है अर इण मांय नौजवानां रो खास काम है।

.....

अजमेर मांय सी.आर.पी.एफ. रा केंद्र-2 मांय लगायी ज्या रोजगार मेळा मांय केंद्रीय आवासन अर शहरी मामलात् राज्य मंत्री कौशल किशोर नौजवानां ने नौकरी लागण रा कागजात सूंप्या। ई मौके वे कह्यो के सरकार नौजवानां ने रोजगार मुहैया करावणो तैय कीनो है। केन्द्रीय मंत्री कह्यो के केन्द्र सरकार री योजनावां ऊं आम इन्सान री जिन्दगी बेहतर बणी है। केन्द्रीय मंत्री सीआरपीएफ, बीएसएफ, आईटीबीपी, एसएसबी, रेलवे, डाक, शिक्षा विभाग अर न्यारा-न्यारा बैका मांय नुवी नौकरी लाग्या नौजवानां ने नौकरी रा कागजात सूंप्या। ध्यानजोग है के हाल ताई लगायी ज्या रोजगार मेळां मांय अजमेर संभाग मांय 1 हजार 900 नौजवानां ने न्यारा-न्यारा सरकारी महकमां मांय नौकरी लागण रा नियुक्ति पत्र दिया जा चुक्या है।

000

केंद्रीय सड़क अर परिवहन मंत्री नितिन गडकरी आज उदयपुर कने डबोक मांय करीब अढाई हजार करोड रूप्या रा खर्च वाळी प्रदेश री 17 सड़क परियोजनावां मांय ऊं कुछ जनता ने सूंपी अर कुछ रा काम री नींव रखी। ई मौके गडकरी कह्यो के जयपुर-दिल्ली बीचे बेगी ई रेलों री भांत बिजली ऊं चालण वाळी बसां चलायी जावेला। वे कह्यो के आं बसां मांय हवाई जहाज सरीखा सुबीता मुहैया कराया जावेला अर वां रो भाडो ई कम लागेला। वे कह्यो के दिल्ली-मुंबई ग्रीनफील्ड एक्सप्रेस वे अर दूजी हाई-वे परियोजनावां ऊं प्रदेश रो विकास और तेज व्हेला।

.....

गडकरी कह्यो के किशनगढ-दिल्ली बीच करीब डोढ़ हजार करोड़ रुपया रा खर्च ऊं जूना नेशनल हाई-वे री मरम्मत रो काम ई बेगो ई पूरो व्हे जावेला। ई मौके केंद्रीय मंत्री कह्यो के किसानां ने अब साखा उगावण सागे बिजली ई पैदा करणी चाहिजे।

कार्यक्रम मांय मुख्यमंत्री भजन लाल शर्मा राज्य मांय सडका रा काम सारू केन्द्रीय मंत्री गडकरी रो आभार जतायो।

000

राजस्थान स्कूल शिक्षा परिषद री ओर ऊं प्रदेश री 133 सरकारी स्कूलां मांय भामाशाहां री मदद ऊं 31 परियोजनावां रा तहत 28 करोड़ 4 लाख रुपया रा कामां री मंजूरी दीरीजी है। लारला दिनां राज्य परियोजना निदेशक अविचल चतुर्वेदी री सदरत मांय राज्य स्तर री संवीक्षा समिति री मीटिंग मांय लिया ज्या फैसला पाछे ई बारा मांय हुकम जारी कर दिया ज्या है। एस.पी.डी. चतुर्वेदी बतायो के स्कूल शिक्षा री ओर ऊं चलाया जा रह्या ज्ञान संकल्प पोर्टल माथे भामाशाहां कानी ऊं स्कूलां मांय विकास सारू मिल्या प्रस्तावां रो जायजो लियां पाछे मंजूर करी ज्यी 31 परियोजनावां रे मार्फत प्रदेश रा 14 जिलां री 133 स्कूलां मांय नुवा भवन, शौचालय अर नुवा बणावण सरीखा काम कराया जावेला।

वे बतायो के अलवर जिला मांय 6, कोटा मांय 5, जालोर मांय 4, जयपुर अर नागौर मांय 3-3, पाली मांय 2 अर बांसवाडा, बारां, बाडमेर, बीकानेर, चुरु, हनुमानगढ, झुंझुनू अर सिरोही जिला मांय एक-एक परियोजना री मंजूरी दीरीजी है।

000

कतर री जेल मांय बंद करी ज्या भारत री नौसेना रा पैली वाळा कर्मचारियां री जेल ऊं रिहाई पाछे अ सगळा कर्मचारी पाछा भारत आ ग्या है। कैप्टन नवतेज सिंह गिल, कैप्टन सौरभ वशिष्ठ, कमांडर पूर्णेंदु तिवारी, कैप्टन बीरेंद्र कुमार वर्मा, कमांडर सुगुनाकर पकाला, कमांडर संजीव गुप्ता, कमांडर अमित नागपाल अर नाविक रागेश ने अगस्त 2022 मांय गिरफ्तार करी ज्या हा जद ई ऊं वे कतर री जेल मांय बन्द हा। 26 अक्टूबर 2023 ने कतर री अदालत आं सगळां ने मौत री सजा सुणायी ही। ध्यानजोग है के कॉप-28 शिखर सम्मेलन रे दौरान प्रधानमंत्री मोदी कतर रा अमीर शेख तमीम बिन हमद अल-थानी सागे बातचीत रे दौरान ई मुद्दा माथे चर्चा कीनी ही। ई पाछे दिसंबर 2023 मांय आं सगळां री मौत री सजा खत्म कर दीनी ही।

000

केन्द्र सरकार कानी ऊं चलायी जा रही जनता रा भला री न्यारी-न्यारी योजनावां री जाणकारी जनता ताई पूगावण अर जनता ने वां रो फायदो दिरावण रा मकसद ऊं चलायी जा रही "विकसित भारत संकल्प यात्रा" रा दूजा दौर रा तैत आज ई राज्य मांय न्यारी-न्यारी ठौड़ां शिविर लगायी ज्या। झालावाड़ मांय लगायी ज्या शिविर मांय प्रधानमंत्री उज्ज्वला योजना रा तहत गैस कनेक्शन देवण समेत न्यारी-न्यारी योजनावां रा स्वीकृति पत्र अर कार्ड दिया ज्या। ई दौरान जनता ने विकसित भारत बणावण री सैगंध दिरायी ज्यी। 'न्यारी-न्यारी योजावां रो फायदो लेवण वाळा मेरी कहानी-मेरी जुबानी रा तहत वां रा अनुभव बताया।

000

राज्यपाल कलराज मिश्र कह्यो है के वो ही समाज तेजी ऊं आगे बढत्र सके है, जिण मांय टाबरियां ने भणार्ई-लिखाई रा बत्ता ऊं बत्ता मौका मिले है। वे आज जयपुर ऊं वर्चुअल तरीका ऊं बीकानेर जिला रा नोखा मांय बणायी ज्या प्रेरणालय 'पदम स्मारक', डिजिटल लाईब्रेरी, संग्रहालय, प्रतिमा लोकार्पण अर बालिका विद्यालय रा काम री नीव रखण रा जळसा मांय बोल रह्या हा। वे कह्यो के महिलावां ने भणार्ई-लिखाई रा बत्ता ऊं बत्ता मौका मिलण परां ई वे पुरुषां रे बराबर आ सकेला। वे केन्द्र सरकार रा 'बेटी बचाओ, बेटी पढ़ाओ' कार्यक्रम ने घणो खास बतायो। इण ऊं पैली राज्यपाल गौसेवी संत श्री पदमाराम जी कुलरिया री याद मांय छापी ज्यी पोथी ई जनता ने सूपी।

000

विधानसभा अध्यक्ष वासुदेव देवनानी कह्यो है के बेगो ही विधानसभा रो डिजिटल चैनल सुरू कर्यो जावेला। वे आज भीलवाडा मांय खबरनवीसां सागे बातचीत कर रह्या हा। देवनानी कह्यो के विधानसभा री कार्यवाही विधायकां रा सवाल—जवाब पूरा व्हेवण ताई चलायी जावेला। वे विधानसभा मांय सत्ता पख अर विपख बीचे तालमेल बिठा र काम करण माथे जोर दीनो।

000

चिकित्सा अर स्वास्थ्य विभाग री ओर ऊं प्रदेश मांय 15 फरवरी ऊं 29 फरवरी ताई चिकित्सा संस्थावां रो जांच अभियान चलायो जावेला। चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह आज जयपुर ऊं वीडियो कॉन्फ्रेंस रे मार्फत अहलकारां सागे चर्चा करता थकां आ जाणकारी दीनी। वे बतायो के लक्ष्य रा हिसाब ऊं जांच नी करण अर जांच पाछे चिकित्सा संस्थानां रा बुनियादी सुबीतां मांय सुधार नी व्हेवण री सूरत मांय संबंधित अहलकारां रे खिलाफ कार्यवाही करी जावेला। शुभ्रा सिंह चिकित्सा संस्थानां मांय साफ—सफाई सारू क्यू आर कोड सिस्टम ने सुरू करण बाबत् कह्यो।

000